

## Bbaluwa eghi Paulo aahandiikiye Beefeeso Kwanjula

Efeeso kikaba kili kibugha kiinamulito haa mwalo ghwa bughuwa ejooba bwa ehanga endindi bakughilaghamu Butuluki. Paulo akaba naakaayeyo kandi naatebejiyeyo kumala myaka esatu (Bikoluwa 19). Bantu bakaniye bakaba mbaabaaye Bakilisitaayo mu kibugha eki na tauni esikili haai.

Paulo aabahandiikila bbaluwa eni ali mu nkomo e Looma. Aabooleka ngu ebo batali Bayudaaya kuhikilija Kilisito, nabo bakaba mu kibbula kya bahikilija. Eki kikaba kitwike kya ntegheka ya Luhanga niikuwo Kilisito abe Mukama wa bintu byona muni na mu eghulu.

Mu nsuula 1—3 Paulo asobolooye ngoku Luhanga aakomiye bantu be aabajuna bibhi byabo kusaalila mu kubalunganiya na Yesu Kilisito mu kukuwa na kuhumbuuka kuwe. Dumbi mu nsuula 4—6 aalaghila Bakilisitaayo ngoku babhonganuuwe kwetwalikaniya nga bantu balungaane na Kilisito.

<sup>1</sup> Sije Paulo, oghu Luhanga aakomiye mu kubbala kuwe kuba mukwenda wa Kilisito Yesu, naahandiikila enuwe bantu baa Luhanga abali Efeeso, beesighibuwa mu Kilisito Yesu.

<sup>2</sup> Luhanga Esetuwe na Mukama waatu Yesu

Kilīsito babaghilile ngughuma kandi babahe mpempa yonkaha.

*Migisa ya Mwoyo eghi eli mu Kilīsito*

<sup>3</sup> Luhanga Ese Mukama waatu Yesu Kilīsito asiimuwe, oghu akutuhaagha migisa yona ya mwoyo kulugha mu eghulu, kukwama mu Kilīsito. <sup>4</sup> Nanga atakahangiye nsi akaba naasanguuwe atukomiye ati tube mu bumui na Kilīsito, niikuwo Luhanga atufoole bantu bahikiliye kandi abatali na musango mu maaso ghe. Akatukunda, <sup>5</sup> kandi aasanguwa atukomiye kufooka baana be kukwama mu Yesu Kilīsito, eghi niiyo ekaba ntegheka yee kandi eghi aabbaliye, <sup>6</sup> Luhanga akakikola niikuwo tumusinde haabwa ngughuma siye sya kuswekaniya aatughiliye busa kukwama mu Yesu Kilīsito oghu akundiye. <sup>7</sup> Ti Luhanga akatucungula haabwa saghama ya Kilīsito, aatughanila bibhi byatu haabwa ngughuma <sup>8</sup> sihingulaane aamaliye aghatughilila haabwa magheji ghe na kumanya bintu byona. <sup>9</sup> Akaleka twamanya ntegheka yee ya nsita, eghi eenini aabbaliye, eghi emudheedhiye kukwama mu Kilīsito. <sup>10</sup> Ntegheka eghi niiyo Luhanga akuusuliya mu bwile obu eenini aboone buhikiye, obu akukumaaniliya hamui ebi aahangiye byona, buli kintu kyona ekili mu eghulu na munsu kandi Kilīsito aaniye mukama wabiyo byona.

<sup>11</sup> Kusaalila mu Kilīsito oghu, Luhanga akatufoola dheer kuba bantu be kusighikila mu ntegheka aali asanguuwe abbaliye kukola,

12 niikuwo etuwe abaadubhiye kuta kunihila kwatu mu Kilisito kutujuna, tumusinde haabwa kitinisa kiye. 13 Naanu dhe mukafooka bantu baa Luhanga obu mwaghuyye butumuwa bwamajima twabatebije, bwa Makulu Ghasemeeye haa Kilisito aghaalekiye mwajunuwa. Mukahikilija Kilisito kandi Luhanga ngoku aalaghiisaniye aaha enuwe Mwoyo Ahikiliye kwoleka ngoku Luhanga alemiye enuwe nga bantu be. 14 Mwoyo Ahikiliye oghu aalekiye aasa aakala mu bwomiji bwatu nkaakulolel'o ngoku alituha eki Luhanga aalaghiisaniye bantu be, niikuwo tumanye ngoku aatucunguuye kulugha mu kibhi, kandi tusinde kitinisa kya Luhanga.

### *Paulo naasabila Beefeeso*

15 Haabwa kighendeleluwa eki, kulugha naaghuuye ngoku muhikilije kwonini Mukama Yesu kandi ngoku mukundiye bantu baa Luhanga boona, 16 tankulekeelelaga kumusijima haabwanu, ti bwile bwona obu nkubaagha ninsaba, nkubaasukagha mbasabila. 17 Nkuukalagha ninsaba nti Luhanga Ese Mukama waatu Yesu Kilisito, oghu ali na kitinisa kyona, abahe Mwoyo Ahikiliye kubaha magheji ghaa kumanya kandi kubasuukulila kwonini ngoku Luhanga ali. 18 Nkubasabilagha dhe nti Luhanga abagubhiisiye kumanya majima ghe, niikuwo mumanye migisa yee ekaniye kimui ya kuswekaniya eghe mukunihila kutunga eghe aabilikiliye bantu be. 19 Kandi mugubhe kumanya ngoku butoki

buwe buli bwamaani munu obukukoonelagha etuwe abakuhikilijagha. Butoki bwamaani obu, <sup>20</sup> niibuwo aakoleeseeyiye mu Kilisito obu aamuhumbuuye mu bakuuye kandi aamusitamiya haa luhande lwa mukono ghuwe ghwabuliyo mu eghulu. <sup>21</sup> Nahabweki Kilisito oghu niye mulemi wa kitinisa munu oghu alemiye boona abali na butoki mu eghulu na muni, kikughiyo kiye kya bulemi kisaaiye bikughiyo banguha balemboona, etali mu bwile buni bwonkaha bhaatu dheer mu bwile obuliisa. <sup>22</sup> Ti Luhanga akata bintu byona hansi ya butoki bwa Kilisito, kandi Kilisito oghu Luhanga ataayo kulema bintu byona oghu, niye mutuwe ghwatu bahikilija. <sup>23</sup> Tuli bitwike bya mubili ghwa Kilisito kandi taali n'eki abuluuw'wo mu kutughanikiilila kyakukola, nanga ali hantu hoono kandi akuhikilijagha bintu byona.

## 2

### *Kuba boomili na Kilisito*

<sup>1</sup> Ti enuwe mukaba mukwiliye mu nsobi na bibhi byanu. <sup>2</sup> Mwakalagha mu bibhi, ngoku bantu baa muni bali, nimuhutiya Sitaani mukulu wa bilimu by'omu mwanya. Niye mwoyo endindi akwete kukola mulimo ghwa-maani mu bantu abakubhengagha kuhutiya Luhanga. <sup>3</sup> Hambele naatu bahikilija boona, tukaba tuli nga bantu aba. Twakolagha ebi buhanguwa bwatu bwa busiisi, mibili yaatu, na byelikano byatu byabalagha. Ti naatu Luhanga angutufubiiye na kiinigha ngoku

akufubila bantu aba. <sup>4</sup> Bhaatu Luhanga haabwa ngughuma sikaniye aatughiliye kandi haabwa kutukunda kwonini, <sup>5</sup> akeeyongela kutufoola boomjili hamui na Kilisito nankabha nt-wabaagha tukuuye haabwa bibhi byatu. Enuwe Luhanga akabajuna haabwa ngughuma siye. <sup>6</sup> Ti Luhanga aatuhumbuula hamui naye kandi aatusitamia hamui naye mu eghulu mu Kilisito Yesu oghu, <sup>7</sup> niikuwo mu bwile obuliisa Luhanga agubhe kutwoleka ngughuma siye syamaanj mu kisa aatughiliye mu Kilisito Yesu. <sup>8</sup> Enuwe mukahikilija mwajunuwa haabwa ngughuma sya Luhanga. Eki tamwakyekoleeye enuwe bonkaha, bhaatu ni kitembo kya Luhanga. <sup>9</sup> Taabaaye kiyo haabwa bikoluwa byanu, nahabweki atab'omuntu n'omui oghu akwepanka. <sup>10</sup> Nanga etuwe Luhanga niye akatuhanga, aatuhanga ati tulungane na Kilisito Yesu niikuwo tugubhe kukola bikoluwa bilungi, ebi Luhanga aasanguwe ateghekiye hambele ati tukole.

*Abahikilije Kilisito boona mbantu bamui*

<sup>11</sup> Nahabweki, enuwe batali Bayudaaya mu bubyalilanuwa bwanu muusuke ngoku mwabaagha hambele. Banaisaaleeli abakusaluwagha haa mubili baabaghayagha bati nanga enuwe tabakubasalagha. <sup>12</sup> Muusuke ngu bwile obu mukaba mwebaghanijj'o Kilisito, mukaba batababaliye mu Banaisaaleeli, mukaba mutabaluwe mu ebi Luhanga aalaghiisaniiye mu ndaghaano siye, mukaba mutali na kunihila, kandi mukaba mutali na Luhanga muni muni. <sup>13</sup> Bhaatu endindi

kukwama mu Kilisito Yesu, enuwe abaabaagha batamaniye Luhanga mukaleetuwa haai-haai naye haabwa saghama ya Kilisito.

<sup>14</sup> Nanga Kilisito eenini niye atuhaaye mpempa, aalunganiya Bayudaaya na batali Bayudaaya kuba bamui kandi aamal'o bunanjighuwa obwabaagha nga kisiika kibabaghanije.

<sup>15</sup> Kukuwa kuwe haa musalaba kukamal'o butoki bwa bilaghilo bya Kiyudaaya n'ebi byalaghilagha bantu kukola. Ti kighendeleluwa kiye kyaba kufoola Bayudaaya na batali Bayudaaya kuba ntula emui mpyaka, kandi niikuwo baakale hamui mpempa,

<sup>16</sup> kandi kukuwa kuwe haa musalaba, kugubhe kuleka Luhanga neekukiliya bombi Bayudaaya na batali Bayudaaya, kandi bunanjighuwa bwabo mbuhuwo.

<sup>17</sup> Kilisito akaasa aatebeja butumuwa bwa mpempa mu enuwe batali Bayudaaya abaabaagha batamaniye Luhanga kandi aatebeja dheer butumuwa bwa mpempa mu Bayudaaya abaabaagha bamaniye Luhanga.

<sup>18</sup> Eki niikiyo kikuleka etuwe bombi haabwa bukooneli bwa Mwoyo Ahikiliye, ntukugubha kuhika hambali Luhanga Esetuwe ali.

<sup>19</sup> Nahabweki, enuwe batali Bayudaaya tamukyali banamahanga kedha bantu abatamanuwe mu bantu baa Luhanga. Muli baakali hamui na bantu baa Luhanga kandi baamemba b'omu ka ya Luhanga.

<sup>20</sup> Bantu aba bali nga Numba ya Luhanga eghi balangi na bakwenda bali nga musingi ghwayo kandi Kilisito Yesu aaniye ali ng'ebaale lyamaanj elihaghikiye numba eghi.

<sup>21</sup> Haabwa kulungana

na Kilisito oghu, boona bali nga numba ekukweluwa hamui kufooka numba ya Luhanga ehikiliye hambali Mukama akuukala. <sup>22</sup> Ti naanu dheer haabwa kulungana na Kilisito, mukwete kukweluwa hamui kufooka kijikalo eki Luhanga akuukalamu mu Mwoyo wee Ahikiliye.

### 3

#### *Paulo murebeji mu batali Bayudaaya*

<sup>1</sup> Ti haabwa eki Luhanga aakoliye eki, niikiyo kilekiye siye Paulo ndi mu nkomo, nanga nku-langililagha enuwe batali Bayudaaya butumuwa haa Kilisito Yesu.

<sup>2</sup> Majima kuwo mukaaghuwa ngoku Luhanga angiliye ngughuma ampa bujunaanijibuwa bwa kubalangilila butumuwa buwe. <sup>3</sup> Butumuwa obu, bukwet'o nsita eghi Luhanga eenini ansuukuliiye, aaleka naaghimanya, eghi naabahandiikiyi'o mu biihi-biihi. <sup>4</sup> Ti, mukaakusoma bini, dumbi mukwetegheeleliya ngoku nimaniiye nsita haa Kilisito, <sup>5</sup> eghi bantu baali batamaniye kulugha hambele, bhaatu endindi eghi Mwoyo Ahikiliye aalekiye bakwenda na balangi bahikiliye baa Luhanga, baamanya. <sup>6</sup> Nsita eghi ni ngu, batali Bayudaaya bakugubha kutunga dheer haa migisa yona, nanga nabo ni mubili ghumui naatu, kandi bakutunga haa ebi baalaghiisanibuuwe mu Kilisito Yesu kukwama mu Makulu Ghasemeeye.

<sup>7</sup> Luhanga akampa kitembo kya ngughuma siye angiliye, kumuheeleliya haabwa kulangilila Makulu Ghasemeeye agha, niiye nkukolagha

haabwa maanĭ ghe. <sup>8</sup> Nankabha ntenganĭiye na bantu baa Luhanga banji boona kĭtĭinĭsa, akangilila ngughuma esi kulangilila batali Bayudaaya migisa ya Kĭlĭsito yamaanĭ eghi muntu ataakugubha kwebbalila. <sup>9</sup> Luhanga akankoma kusoboolola bbenĭ-bbenĭ bantu boona ntegheka ya nsĭta eghi, eghi eye oghu akahanga bintu byona aali atakasukulĭiye bantu kughimanya kulugha hambele na hambele. <sup>10</sup> Eki aaghendeleeye ni ngu endindi, kibbulu kya bahikilija bagubhe kuleka ebili na butoki kandi na milimu eghi elemiye mu mwanya byona mbigubha kumanya ngoku Luhanga ali na magheji ghahingulaane, <sup>11</sup> aghasighikiye mu bighendeleluwa biye ebi aahikilĭiye hambele kukwama mu Kĭlĭsito Yesu Mukama waatu. <sup>12</sup> Haabwa kulungana kwatu na Kĭlĭsito kandi kumuhikilija tukugubha kuhika hambali Luhanga ali tutoobahiye kandi tugumiye. <sup>13</sup> Nahabweki nkubasaba, mutahuwa maanĭ haabwa kubona mbambona-bonĭya haabwanu, eki kikubalughilamu kuba na kĭtĭinĭsa.

### *Paulo naasabila bantu b'omu Efeeso*

<sup>14</sup> Eki niikiyo kikulekagha nteeliya ninsaba mu maaso ghaa Esetuwe w'omu eghulu, <sup>15</sup> oghu akahanga boona ab'omu eghulu na baa muni kandi boona aabaha maliina. <sup>16</sup> Nkusabagha nti Luhanga oghu ali na kĭtĭinĭsa kikanĭiye agumiye mitima yaanu kandi abahe maanĭ naakoleesiya Mwoyo Ahikilĭiye wee. <sup>17</sup> Abakolele eki niikuwo muhikilije ngoku Kĭlĭsito ali mu bwomiili bwanu. Kandi nkusabagha dhe nti



eki mulakolagha kyona, kilughaghe mu kukunda muli na kuwo, <sup>18</sup> niikuwo enuwe hamui na bantu baa Luhanga boona mube na maani ghaa kumanya kwonini lulengo lwa ngoku Kilisito abakundiye kwonini, <sup>19</sup> kandi niikuwo mumanye ngoku Kilisito abakundiye kusaaliya ngoku mukugubha kwetegheeleliya, niikuwo mugubhe kuba kwonini haa lulengo olu Luhanga akubbala.

<sup>20</sup> Ti Luhanga oghu akugubha kutukolela ebihingulaane kusaaliya ebi tukugubha kumusaba kedha kuteekelej'o, kandi oghu ali na butoki obu akukoleesiyagha byona ebi akutukolelagha, <sup>21</sup> oghu aaniye aaheebuwa kitinisa mu kibbula kya bahikilija kandi mu Kilisito Yesu mu mijo yona, bilo n'ebilo! Aamijina.

## 4

### *Kukolela hamui nga mubili ghumui*

<sup>1</sup> Sije Paulo oghu ndi mu nkomo haabwa kuheeleliya Mukama Kilisito, ndimabeesengeleliya nti mutwalikaniye nga bantu aba Luhanga aabilikiye ngoku babhonganuuwe kutwalikaniya. <sup>2</sup> Mudhotele kimui kandi mwetwalikaniye buke-buke; mugumisilijangane kwoleka ngoku mukundangaane. <sup>3</sup> Mut'o kulu na nkokolo kuukala muli mu bumui obu Mwoyo Ahikiliye akubahaagha, ti mwoleke bumui obu haabwa kuukala hamui mpempa. <sup>4</sup> Etuwe bahikilija tuli mubili ghumui kandi tuli na Mwoyo Ahikiliye omui, tuli na kunihila kumui haabwa Luhanga

kutubilikila kuhikilija Kilisito. <sup>5</sup> Tuli na Mukama waatu omui enkaha Kilisito, twaba na kuhikilija kandi kubatijibuwa kumui. <sup>6</sup> Twaba dheer na Luhanga omui enkaha kandi Ese wa bantu boona, niye atulemiye etuwe boona, niye akutulaghilagha byakukola kandi aleka tubimala kandi niye akutuukalaghamu bwile bwona.

<sup>7</sup> Etuwe boona Kilisito mu ngughuma siye akatuha bisembo byambaghanija ngoku abaliye. <sup>8</sup> Ngoku mu Ebyahandikuwe bighiliye bit,

“Obu aaniniye kusaala hambali mwanya ghuheleeye,

aatwala abali nga aba bakwete haa bulemo

kandi aaha bantu be bisembo.”\*

<sup>9</sup> Kughamba ngu Kilisito akaniina kikumanisiya ngu akadubha aasa muni yaatu eni ya buli kilo eghi tulimu. <sup>10</sup> Kilisito oghu akaasa

oghu niye dheer akaniina kusaalila kimui hambali mwanya ghuheleeye niikuwo bulemi buwe bugubhe kumalakaka kyalo kyona. <sup>11</sup> Niye

eenini akaleka bamui baaba bakwenda, banji balangi, banji balangilili baa Makulu Ghaseme-eye ghaa Luhanga, banji kuba baliisiya kandi

banji kuba beegheesiya. <sup>12</sup> Akakola eki niikuwo bateekanije bantu baa Luhanga kukola mulimo ghwa kumuheeleliya kandi bahikilija

aba nga mubili ghwa Kilisito bagume mu kuhikilija kwabo. <sup>13</sup> Eki kikweyongela mu maaso kuhikiya etuwe boona tuli mu bumui

kwonini mu kuhikilija kwatu, tumaniye kwonini Kilisito Mwana wa Luhanga, tukuliye kwonini

---

\* 4:8 4:8 Jabbuli 68:18

mu kuhikilija kwatu kandi tubaaye kwonini bahikiliye kwenganiya ngoku Kilisito ali.

<sup>14</sup> Nitwabaaye tutiyo tuleka kuba nga abatakuliye mu kuhikilija, kutwalilijibuwa njegheesiya ya bisubha. Tutaba nga bwati haa maasi obu mpwegha ekutwalagha eni n'eli, naatu kutwalilijibuwa buli njegheesiya yona eghi bantu baa bisubha kandi baa lugheji-gheji bakwegheesiya. <sup>15</sup> Mu kikalalo kya kuba tutiyo tubughilanganaghe majima tukundangaane, niikuwo mu byona ebi tukukola tweyongele kukula mu kumanya Kilisito oghu ali mutuwe ghwa bahikilija boona. <sup>16</sup> Niiye akulunganiyagha kandi akwataniya buli kitwike kya mubili ngoku kili. Nahabweki buli kitwike nkyabaaye nkikola kulungi, mubili ghukukulagha kandi ghukweluwa mu kukunda.

### *Bwomiji buhyaka mu Kilisito*

<sup>17</sup> Nahabweki haabwa butoki obu Mukama Yesu ampaaye ndimaghambila enuwe bahikilija nti mutatodha kweyongela kuukala nga bantu abatamaniye Luhanga, abakukuukalagha mbeelilikana kukola bintu ebitali na mughaso. <sup>18</sup> Nanga eki, tabakugubhagha kwetegheeleliya kusemeeye ebikwet'o Luhanga, kandi tabakwetwalikaniyagha nga bantu baa Luhanga nanga kwomakakana kwa mitima yabo haa Luhanga. <sup>19</sup> Tabakyelilikana kusemeeye bbaa, bakeehelayo kimui kuukala bwile bwona mbakola bikoluwa bya busyani, bwomiji bwabo buusuuyemu bikoluwa bibhiihiye bya

milingo yona kandi mbeekumbula kweyongela kubikola.

<sup>20</sup> Bhaatu enuwe taaliikuwo baabeegheesey'o Kilisito batiyo bbaa.

<sup>21</sup> Majima kuwo bakabaghambil'o yee kandi baabeegheesya majima aghali mu Yesu oghu.

<sup>22</sup> Baabeegheesya ebikwet'o njikala yaanu obu mwabaagha mutakahikiliije Kilisito, kutatodha kuukala nimunakola bikoluwa bibhijiye, ebyabaagha biisuuyemu kudimaaguwa na kweghomba kwa milingo yona.

<sup>23</sup> Baabeegheesya bati muleke Luhanga ahindule byelilikano byanu niikuwo mutandike kuteekeleja mu mulingo ghuhyaka.

<sup>24</sup> Kandi mubhonganuuwe kweyoleka kwonini nga bantu bahyaka aba Luhanga aafuoye kuba bahikiliye mu majima kandi balukwela.

<sup>25</sup> Nahabweki buli omui mu enuwe bahikilija, aleke kuha bisubha kandi mughambilanaghe majima ghonkaha, nanga etuwe boona tuli bitwike bya mubili ghumui.

<sup>26</sup> "Muntu alakak-watuwagha kijnigha eelinde atasija."\*

Muntu ataleka musana ngukota onakwatuuwe kijnigha,

<sup>27</sup> kandi mutaha Sitaani kagisa kuboohiya kuleka nimusija.

<sup>28</sup> Weena oghu aabaagha ali musuma atakahikiliije Kilisito, abhonganuuwe kuleka kwibha, bhaatu eekolele na maani ghe, niikuwo eetungile byakumukoonela kandi n'ebi akukoonela nabiyo abali mu bwetaagho.

<sup>29</sup> Mutalibughilana bighambo byona bibhijiye, bhaatu mubughilanaghe ebisemeeye kandi ebikugumiya baanyakyanu mu kuhikilija

---

\* 4:26 4:26 Jabbuli 4:4

kwabo kusighikila ngoku bakwetaaghisibuwa, niikuwo bigubhe kughasila abakubitegheeleliya. <sup>30</sup> Mutaleka Mwoyo Ahikiliye naasaaliluwa, nanga niye Luhanga aabahaaye nga kaakulolel' o kwoleka ngoku muli bantu be, kandi ngoku alibacungula kwonini. <sup>31</sup> Mulekele kimui kusaakala, kiinigha, kusaaliluwa, kwambulana na kuhangililana, hamui na milingo enji yona ya kuba na etima. <sup>32</sup> Bhaatu mughililanganaghe kisa kandi mukolanganaghe kusemeeye, nimughanilangana ngoku naanu kukwama mu Kilisito Luhanga aabaghaniye.

## 5

<sup>1</sup> Nahabweki ngoku muli baana baa Luhanga aba akundiye kwonini, mutwalikaniye ngoku eye akutwalikaniyagha. <sup>2</sup> Kandi muukale mukundangaane ngoku Kilisito aatukundiye ehaayo nga kihonguwa kutukwila kandi eki

Luhanga asijimye.

<sup>3</sup> Hatalib' o muhikilija n' omui oghu akusyana mu mulingo ghwona, kedha kuba na kweghomba kubhijhiye, kedha mululu, nanga takihikiye bantu baa Luhanga bahikiliye kukola ebi. <sup>4</sup> Kandi tamubhonganuuwe kuba eghi na kalimi kabhijhiye, kubugha bintu byakidhoma-

dhoma, kedha kusandaala kubhijhiye, ebi tabibabhonganuuwe bbaa, bhaatu muukalaghe nimusijima Luhanga. <sup>5</sup> Nanga mumaniye ngoku ataliyo musyani, kedha oghu akukola bikoluwa bjbhijhiye, kedha wa mululu ghwa bintu oghuli nga kulamiya bisasani, oghu aliba mu bulemi

bwa Kilisito hamui na Luhanga. <sup>6</sup> Mutasijima

muntu n'omui kubadimaaga na bighambo ebitali na mutuwe na maghulu, nanga bintu ng'ebi niibiyo bikuleka Luhanga naafubila bantu abamujeemeeye na kiinigha. <sup>7</sup> Nahabweki muleke kuba mu bumui na bantu aba.

<sup>8</sup> Hambele mukaba muli nga bantu abali mu mwelima nanga mukaba mutamaniye Luhanga, bhaatu endindi haabwa kuhikilija Mukama muli nga bantu bali mu kyeleeli. Mwetwalikaniye nga bantu abali mu kyeleeli. <sup>9</sup> (Nanga muntu oghu ali mu kyeleeli, akukolagha bilungi, bihikiye, kandi byamajima.) <sup>10</sup> Mut'o kulu na nkokolo kukola ebidheedhiye Mukama. <sup>11</sup> Mutakolagha bikoluwa bihiihiye bya mwelima, ebitali na mughaso, bhaatu mwolekaghe bbeni-bbeni ngoku bili bibhi. <sup>12</sup> Nanga bintu ebi abatahutiye Luhanga bakukolagha mu kibiso na kubibugh'o kwonkaha kukukwatiyagha nsoni. <sup>13</sup> Bhaatu ebikukwatiyagha nsoni ebi, kyeleeli kyamajima ghaa Luhanga kikaakubyolekagha, bantu bamanya bbeni-bbeni ngoku bili bibhi kwonini. <sup>14</sup> Nanga kintu kyona eki kyeleeli kyolekiye bantu bakukibonagha bbeni-bbeni. Niikiyo kikulekagha bantu baghila bati,

“Osusumuke, mughwesaghili uwe,  
ohumbuuke mu bakuuye,  
Kilisito akukuha kyeleeli kiye.”

<sup>15</sup> Nahabweki mwelinde mu mitwalikaniye yaanu, muteetwalikaniya nga bantu badhoma-dhoma, bhaatu nga bagheji, <sup>16</sup> mukoleesiye kulungi bwile obu muli na buwo buni, nanga bilo bini bantu bahingulaane kukola bikoluwa

bj**h**i**i**h**i**y**e**. <sup>17</sup> Muteetwalikaniya nga badhoma-dhoma, bhaatu mwetegheeleliye ebi Mukama K*il*i**s**i**t**o akubbalagha ati mukole. <sup>18</sup> Muteeha tamiilo ya v*ii**n**i eghi ekubaleeteleja bughuwa-ghuwa. Mu k*ii**k**alo ky'eki, muleke Mwoyo Ah*h*i**k**i**l**i**i**y**e** aliye aakala mu bwom*il**i** bwanu kwonini. <sup>19</sup> Muukalaghe nimulimbila hamui Jabbuli na bilimbo bya mwoyo. Mulimbaghe na mitima yaanu yoona bilimbo byakusinda K*il*i**s**i**t**o Mukama waatu. <sup>20</sup> Bwile bwona m*u*s*i*m**a**ghe Luhanga Esetuwe haabwa byona, mu l*i*i**n**a lya Mukama waatu Yesu K*il*i**s**i**t**o.***

<sup>21</sup> Mudhootelangane kwoleka ngoku muhutiye K*il*i**s**i**t**o.

### *Bakali na beebabo*

<sup>22</sup> Enuwe bakali, mudhotele b'ebaanuwe ngoku mudhoteeye Mukama K*il*i**s**i**t**o. <sup>23</sup> Nanga musaasa niye mutuwe ghwa mukali wee ngoku K*il*i**s**i**t**o ali mutuwe ghwa k*i*b**b**u**l**a kya bah*h*i**k**i**l**i**j**a, aba aajuniye kandi ebo baaba mubili ghuwe. <sup>24</sup> Ngoku k*i*b**b**u**l**a kya bah*h*i**k**i**l**i**j**a bali na kudhootela K*il*i**s**i**t**o, niikuwo bakali babhonganuuwe kudhootela beebabo mu buli kintu.

<sup>25</sup> Basaasa mukunde bakali baanu ngoku K*il*i**s**i**t**o aakundiye k*i*b**b**u**l**a kya bah*h*i**k**i**l**i**j**a kandi eehaayo kubakwila, <sup>26</sup> niikuwo babe bah*h*i**k**i**l**i**i**y**e** haabwa butumuwa buwe kandi kubanaabiya na maasi kukwama mu kubat*i*j**i**buwa. <sup>27</sup> Niikuwo eekuukiliye bah*h*i**k**i**l**i**j**a aba basemeleeye kimui, batali na kabhi koono kedha kalofu haa mitima yabo, bhaatu bali bah*h*i**k**i**l**i**i**y**e** kandi batali na kyona bakubasoghos'o. <sup>28</sup> Niikuwo dheer na

basaasa babhonganuuwe kukunda batiyo bakali baabo, ngoku bakundiye mibili yabo yoonini. Oghu akukunda mukali wee akuba nooleka ngoku eekundiye eenini. <sup>29</sup> Nanga taaliyo muntu oghu oohiye mubili ghuwe bbaa, bhaatu akughuliisiyagha kandi oghuloleelela kuseme-eye, ngoku Kilisito akukolagha kibbula kya bahikilija, <sup>30</sup> nanga tuli bitwike bya mubili ghuwe. <sup>31</sup> “Eki niikiyo kilalekagha musaasa alekaghe ese wee na nina wee eebohel’o mukali wee, ti babe muntu omui.”\* <sup>32</sup> Eni ni nsita yamaani kughyetegheeleliya, bhaatu eki nkwete kubugh’o ni Kilisito na kibbula kya bahikilija. <sup>33</sup> Nahabweki, buli muhikilija weena, akulaghiluwa kukunda mukali wee ngoku eekundiye eenini, kandi na mukali akulaghiluwa kuhutiya eba wee.

## 6

### *Baana na babyaye baabo*

<sup>1</sup> Enuwe baana, haabwanu kulungana na Mukama Kilisito, muhutiye babyaye baanu, eki niikiyo kihikiye kukola. <sup>2</sup> Ebyahandiikuuwe bighiliye biti, “Ohutiyaaghe so waawe na njoko waawe.” Ti eki niikiyo kilaghilo kyokudubha hambali Luhanga aalaghiiye kintu kukuluwa aatodha aat’o eki aalaghanije haabwakiyo ati, <sup>3</sup> “Bintu bikukughendekela kusemeeye kandi akumal’o kabili munsu.”\* <sup>4</sup> Beese baana, mulingo mukutwalikaniyamu baana baanu ghutaleka

\* **5:31** 5:31 Kubanja 2:24 \* **6:3** 6:3 Kyabilaghilo 5:16



basaaliluwa; bhaatu mubakujiye nimubahana kandi nimubeegheesiya mulingo ghwa kuhutiya Mukama Kilisito.

*Basyana na bakama baabo*

<sup>5</sup> Enuwe bahikilija abali basyana baa bantu, mudhootelaghe bakama baanu baa muni muni. Mubahutiyaaghe kandi muboobaaghe na mutima ghumui, ngoku mwanguhutiye Kilisito.

<sup>6</sup> Mutakikola obu baliyo bwonkaha muti niikuwo babasiime, bhaatu mukikolaghe muuhiye haa mutima kwoleka ngoku muhutiye Mukama Kilisito. Kandi mukikolagha kusighikila haa ntegheka ya Luhanga. <sup>7</sup> Nahabweki mukole mulimo ghwanu oghu na mutima ghumui ngoku mwangughukoleeye Mukama Kilisito, <sup>8</sup> nanga mukimaniye ngoku Mukama Kilisito aliha bisembo muntu weena haabwa buli kilungi eki muntu aakoliye nankabha muntu oghu aba ali musyana kedha atali musyana.

<sup>9</sup> Naanu bakama baa basyana, mubatwalikaniyaaghe kusemeeye, mutaakubobahililiya, nanga enuwe hamui nabo Mukama waanu ni omui oghu ali mu eghulu. Kandi eye taakusoololagha bantu bbaa.

*Ngoku bahikilija bangulwanisiya Sitaani*

<sup>10</sup> Hatiini mube baamaanj mu kulungana kwanu na Mukama Yesu kukwama mu maanj ghe ghaamaanj. <sup>11</sup> Mube na bya kulwanisiya byona bya Luhanga niikuwo mugubhe kwemililila lugheji-gheji lwa Sitaanj. <sup>12</sup> Nanga tatukwete kulwana na bantu ng'atu, bhaatu tukwete kulwana na bilimu ebili na

butoki kandi maani ghaa kulema munsu muni eghi eesuuyemu bubhi, na ebili na butoki kandi maani ghaa kulema mu mwanya.

<sup>13</sup> Nahabwekiini mube na bya kulwanisiya byona bya Luhanga, niikuwo bwile bwa Sitaani kubalumba mbwahikiye mugubhe kumusaagha, niikuwo haakumaliilila kwa byona muukale munagumiye. <sup>14</sup> Mube nga muusilikale haa bulemo. Mwebohele haa majima ngoku akwebohagha mucipi. Ti muluwaale mu kikubha kyoma kya kuba bahikiliye kubalinda.

<sup>15</sup> Ngoku akuluwaalagha nkaito kweteekanija, aliikuwo naanu mweteekanija kughenda kughambila bantu Makulu Ghasemeeye ghaa Luhanga aghakubaha mpempa. <sup>16</sup> Kwongela h'ebi byona, kuhikilija kwanu kube nga ngabo yaanu, okukuleka nimusaagha lughejigheji lwona lwa bya Sitaani. <sup>17</sup> Muluwaale kiisipeewa kya kyoma kya kujunuwa, kandi mukwate kihyo kya Mwoyo, ekili kighambo kya Luhanga. <sup>18</sup> Bwile bwona musabaghe haabwa byetaagho byanu byona ngoku Mwoyo Ahikiliye akubooleka. Muukale mumanije eki, kandi muukale nimusabila bantu baa Luhanga boona.

<sup>19</sup> Ti nanje dheer munsabile, Luhanga ampaaghe bighambo byakubugha, niikuwo mbughaghe ntoobahiye obu ndabaagha ninsoboolola bantu nsita ya kujuna kwa Luhanga eghi eli Makulu Ghasemeeye. <sup>20</sup> Makulu Ghasemeeye agha Kilisito antumiye kulangilila niigho ghalekiye ndi mu nkomo. Munsabile ngu ngubhe kughalangilila ngoku nibhonganuuwe kandi ntoobahiye.

*Paulo naasaba Luhanga kuha bahikilija mugisa*

<sup>21</sup> Tikiko, muhikilija muunakyanu oghu tukundiye kandi muheeleliya mwesighibuwa wa Mukama, akubaghambila byona mulingo ndimu eni kandi n'ebi nkwete kukola. <sup>22</sup> Eki niikiyo kyalekiye naamutuma eghi niikuwo abaghambile ngoku tuli, kandi abeekambiisiye mu kuhikilija kwanu.

<sup>23</sup> Luhanga esetuwe na Mukama waatu Yesu Kilisito ahe enuwe bahikilija mpempa, kandi babagubhiisiye kuukala munahikilije Yesu kandi munakundangaane. <sup>24</sup> Luhanga aghilile ngughuma enuwe boona abakundiye Mukama waatu Yesu Kilisito na kukunda okutaahuw'o.

**Ndaghaano Mpyaka Mu Lubwisi**  
**Talinga-Bwisi: Ndaghaano Mpyaka Mu Lubwisi**  
**(Bible)**

copyright © 2019 Wycliffe Bible Translators, Inc.

Language: (Talinga-Bwisi)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source  
files dated 29 Jan 2022

928c080e-d746-567f-a478-b44698424e44